

東
華
續
錄

東華續錄

乾隆三十八

臣王先謙敬編

臣周澐蕃恭校

秋七月癸亥諭武職兼銜乃沿明代舊制其中升銜升任條例紛繁卽以敘錄軍功不可不留此勳階以爲獎賞之地然與見任職事何與焉徒使胥吏得以高下其手且外省參遊遇升銜調任畏其遷移繁費至有營求督撫保奏留任者是升銜本以鼓勵戎行而日久轉爲苦累亦何用此虛文爲也嗣後武職中之大銜小銜應作何刪除更定一歸簡易止就見在官職分別年分論俸升轉之處著該部詳悉定議其軍功給札議敘作何分別階級及漕運河工從前照軍功議敘者應行改爲加級紀錄之處一併酌定具奏尋議參遊都守各缺悉按等級推升必須多寡相稱查各省參

將一百六十三缺遊擊四百五十缺都司三百四十八缺守備八百十八缺向例加署都司銜之守備卽升遊擊是守備尙可兩途升用今加銜旣刪守備止升都司則都司缺少守備人多未免遲滯臣等酌議請於各省遊擊除分防要地未便更易外酌改都司八十缺其應何營更改之處令各督提酌定報部註冊所有應改各缺其見在人員仍照原官升轉俟升調離任後陸續改換則守備之缺倍於都司都司之缺多於遊擊升途更寬至水陸分途升用止於本營內較俸不必加銜軍功議敘人員向係按功加等次兼銜給札推升時照京俸一年作半年算應將此項人員升補實缺無庸給與虛銜運糧衛弁向有加銜加級不同以省分之遠近運次之多寡爲量原照軍功例從優獎勵應請將加銜改爲加級准其隨帶其河工武職議敘俱係加級紀錄並不加銜應毋庸議

得旨著卽施行○甲子以于敏中爲內閣學士

由詹事選

○戊辰諭江

蘇巡撫莊有恭覆奏學政任內接收丁文彬逆書昏憤縱逆罪無可逃請交部嚴加治罪一摺此案前據楊應琚奏到降旨詢問莊有恭令查取逆書進呈旋據奏稱於乾隆十四年曾有瘋人丁文彬跪獻此書當時並未留心查閱後以不復寓目事隔五年不知敗簾破篋中果存此冊否俟捕蝗回署細檢等語朕卽知其心存取巧必不將原書查取呈覽姑先爲此奏豫存掩飾地步當卽批令細查書來不得終歸烏有今果以空言回奏不出朕之所料丁文彬逆書內敢於指斥本朝妄肆詆訕莊有恭之意蓋恐進呈此書則罪戾顯然故藉詞尋覓不見以避重就輕夫大逆不道之詞豈有曾經寓目致令迷失之理必係聞信查出私爲銷毀耳莊有恭受朕深恩不應狡詐爲鬼蜮伎倆至是也卽拏問治罪亦所應

得但天下之似此者未必僅莊有恭一人伊爲巡撫尙屬能辦事且伊巡撫任內若見此等必早爲奏辦當在學政時其意不過以學政司文衡之員何必多此一事是其罪不在巡撫而在學政且欲保全學政俸祿養廉耳著照伊學政任內所得俸祿養廉數目加罰十倍交兩江總督請旨以爲徇名利而忘大義者戒○壬申諭從前將八旗滿洲人員選用外省文武等官其蒙古旗人分用部院者員缺本少是以外任未經議及朕思滿洲蒙古均屬本朝世僕伊等於外任分缺銓用之處亦宜量予疏通見在滿洲司員升用道府旣經暫行停止其文職同知以下著將蒙古人員與滿洲一體揀選引見選用武職副將以下著就滿洲應得缺內酌予十分之二其作何分班輪選之處仍著該部定議具奏尋議滿洲人員外用同知以下等官或揀選保送或按俸截取其選用班次

向有成例嗣後應用滿洲人員時將蒙古人員一體截取保送揀
選考試按照各班帶領引見其奉旨記名者入於滿班內通較俸
次深淺名次先後選用又蒙古人員於武職副將以下滿洲應得
缺內酌予十分之二請嗣後應用滿員缺出俱於補放滿洲四缺
之後補放蒙古人員一次照例行文咨取至輪用千總一項兵部
行文八旗蒙古於所屬親軍前鋒護軍內每旗保送四五名咨部
考驗揀選引見記名註冊亦俟滿洲補用四缺後第五缺將蒙古
製補一名命下卽按旗分辦理並載入例典遵行從之○諭州縣
捕蝗不力既有革職拏問之定例又有不申報上司者革職之例
一事而多設科條適足滋弊卽堂司官或知奉法而吏胥之稱引
條例上下其手被議者或重或輕紛滋訛議年來直隸查參捕蝗
不力之案辦理多未盡一卽其證也至州縣捕蝗需用兵役民夫

並換易收買蝻子自有費用其勤民急公者或不費而事已濟而
錙銖是較玩視民瘼者多往往藉口無力捐辦見在各省尋常事
件尙得動公辦理似此要務何以轉不動支公項朕謂捕蝗不力
必應遵照 皇考世宗憲皇帝諭旨重治其罪不可姑息而費用
則應准其動公嗣後州縣官遇有蝗蝻不早撲除以致長翅飛騰
貽害田稼者均革職拏問著爲令其有所費無多自行捐辦而實
能去害利稼者該督撫據實奏請議敘其已動公項而仍致滋害
傷稼者奏請著賠又今歲江南各屬蝻孽萌生雖經該督撫具奏
然從未將地方官據實題參豈非庇下而欺遠著該督撫明白回
奏尋奏覆查沛縣蝗蝻因新舊令彼此推諉撲捕不力揆延之咎
固在前署令卽深造而面誑飾說則新令孫循微更不可信經臣
參奏部議革職在案繼巡查至安東海州據道府稟揭安東五港

司巡檢李師悅海州惠澤司巡檢金昊皆查捕不早至長翅搭鞍
捏報飛蝗希圖卸責是以將兩巡檢咨部革職拏問餘印委各員
尙能勉辦理不致有傷禾稼報聞○以江南邵伯湖減水二閘
及高郵市邏壩決命策楞劉統勳往江南會同高斌查辦水災○
癸酉封戴佳氏爲 嬪○庚辰諭御史曹秀先請頒發御製祭文
遇有蝗蝻郡縣卽行騰黃告祭之處所見甚爲迂謬蝗蝻害稼惟
當實力撲捕此人事所可盡至於祈神報賽禮亦宜之若欲假文
辭以期感格如唐韓愈祭鱷魚事其鱷魚之遠徙與否究亦無稽
未必非好事者流附會其說朕非有泰山北斗之文筆似此好名
無實之舉深所弗取所請不必行餘著議奏尋議該御史摺內稱
舊時州縣捕蝗多係捐辦今奉旨許令動公該州縣意必報多上
司限以報少駁詰往返愈煩案牘請嗣後捕蝗時雇募夫役並換

易子價值動用錢糧令同城教職佐雜一面會同給發一面僉
書名押開報該管上司查覈並嚴飭不得假手家人書吏致滋混
冒應如所請從之○壬午諭國家設官分職期於有裨實政若同
一官而差分階級膺此任而兼帶他銜於官制體統殊爲未協如
翰林部曹小京官補用御史既經簡擢同列諫垣卽應無所區別
乃舊有五品六品之分試俸不試俸之異又如各省道員例以布
政使司參政參議按察使司副使僉事等銜分別兼帶但道員職
司巡守以整飭吏治彈壓地方爲任至於錢穀刑名則藩臬專責
各有攸司且知府以下悉其統轄兼參議僉事銜者階秩反卑其
何以表率此皆舊例相沿宜爲變通以歸畫一而重職守嗣後給
事中著仍爲正五品御史俱改爲從五品不必試俸直省守巡各
道著俱爲正四品停其兼銜其道員俸深應如何銓敘之處該部

定議具奏尋議查道員外升按察使原不分參政副使參議僉事等兼銜先儘卽升卓異人員列名於前次將俸深人員任內無事故者通行開列具題補授仍應遵照辦理至道員內升京堂等官向例兼參政銜者升太常寺少卿鴻臚寺卿兼副使銜者升太僕寺少卿通政使司參議兼參議僉事銜者升光祿寺少卿鴻臚寺少卿今道員旣俱定爲正四品若僅以副使道所升之太僕寺少卿通政使司參議升用未免缺少人多查太常寺少卿鴻臚寺卿向係從三品道升缺光祿寺少卿向係從四品道升缺品級雖有稍異而員缺並未裁減升轉未甚懸殊應請准其一體升用至鴻臚寺少卿一缺係從五品向爲正五品道升缺今道員旣改爲正四品與鴻臚寺少卿品秩稍殊應毋庸以道員升用從之○禁繙譯清字小說○是月布政使學習河務富勒赫奏臣奉命查勘蕭

礪一廳止有埽工一段料物略備餘若銅沛邳睢宿虹桃源海防等五廳隄埽工程不能一律高厚料物亦不敷用至外河山安兩廳埽工多已上水料物亦無堆貯臣細加訪問始知各廳將歲修搶修錢糧任意虧空以致工料無措應請敕令高斌張師載逐一覈實清理並虧空誤工各員嚴察治罪得旨此非高斌所能辦已有旨了

八月甲申 上御經筵○命貴州改設那貢塘驛路○丙戌御史蔣元益奏河防官員於一應河務事宜皆須親身查勘先事豫防近聞河道總督高斌顧琮俱已抱疾步履艱難或遇異漲險工恐不能輕騎疾馳親往調度應請敕令解任另簡能員諭御史蔣元益請敕令高斌顧琮解任一摺所奏甚屬取巧用人乃政治之大端朕於中外大小臣僚凡有簡任罔不衡量審慎況在大臣畀以

要職者何日不往復於懷豈待小臣提奏始加省察耶科道職司
言路大臣中果有營私舞弊貪婪不職等情卽明列彈章亦分所
應爾如謂年齒衰邁夙膺痼病要於辦理諸事並無妨礙豈可輕
爲棄置高斌未任河道以前向有足疾眾所共知以其老成練達
熟悉河務是以簡任南河總督伊莅任以來數載辛勤毫無貽誤
豈以不能輕騎疾馳遂足爲累耶且協辦則有張師載學習則有
富勒赫卽地方遼闊亦不待高斌之輕騎疾馳也至於顧琮才幹
雖少誠樸有餘於河務尙堪經理夏間陳世倌曾面奏其不能動
履及詢之史貽直則謂尙能照舊辦事史貽直之子史奕昂見任
河道或因其子爲彼屬員不敢據實陳奏或利其易事不欲更易
上官此亦人情所有隨復詢問豫東兩省巡撫儻伊等覆奏彼此
互異自當別爲籌畫而該撫等同聲一辭謂夙疾漸愈則其堪膺

職任更可無疑矣朕臨馭天下一秉至公毫無成見卽照察所及從不以用智矜明爲尙惟達聰明目公聽並觀輕重妍媸因物付物此無不可與天下明白曉諭者若謂蔣元益受陳世倌風指敢爲此奏亦未必然卽有之亦無形迹不欲因此興大獄也此不過見策楞劉統勳奉差江南見有查辦之事度其必爲河臣而發是以豫行陳奏以沽建白之名其揣度迎合之私心又何能逃朕洞鑒耶將來策楞等查出情弊果係高斌張師載實有徇隱據實參劾自有應得處分蔣元益以微末小臣取巧妄奏甚屬不合著嚴行申飭○己丑命江南截留漕糧四十萬石及戶部秋撥銀兩備賑○癸巳諭原任侍郎劉綸將次服闋著來京補授戶部侍郎其未到之前戶部侍郎事務著衛哲治暫行兼管○戊戌 上奉皇太后啓鑾秋禰木蘭○己亥免經過地方本年額賦十分之三

○諭軍機大臣等南河此番發覺之案殊出意外當富勒赫奏到時朕意高斌張師載渾厚易欺爲屬員蒙蔽咎止失察耳乃據高斌所奏九萬餘兩之數既經查出仍不行參奏而聽河員之自爲彌縫是竟成通同故縱雖高斌張師載身無染指而明知侵冒其罪非僅失察公過而已今全河積年陋弊盡行敗露若不極力整頓將來仍不過革職留任勒限著賠則國家之功令不行不但河員視侵虧爲分所當然將各省督撫聽徇屬員通同舞弊之惡習何所底止耶但俟策楞劉統勳逐一清查具題著追則虧空人員久不離任將益肆侵虧又一時不得如許接辦之員亦非所以慎重河務著傳諭策楞劉統勳就所查出及得之採訪者約舉大數一面奏聞請揀發道府以下人員往南河接辦一面將虧空各員摘印看守策楞暫行署理南河河道總督印務並高斌張師載應

得處分俱俟奏到日另降明旨所有虧空之項竟不必行文原籍查產蓋河員信息最速一聞清查之信隱匿寄頓亦無所不至其前任應賠之河道何燭等輩欵差甫出都門其貲財先已密爲運寄卽照例行文查產亦復何益將來惟予限一年限內不全完者無論本年句到不句到卽行正法庶河員稍知儆畏嗣後工料尙不至全歸子虛朕意如此將此一併諭策楞劉統勳知之又下河災務時切朕懷何不速奏以慰懸念尋奏下河被災等處業經委司督率各員查賑其結茅就隄棲止者均已撫恤餘戶見在挨查分別極貧次貧尙未得有確數所有疏洩積水借給籽種各條亦已行司查案分別定議報聞○辛丑命永常回湖廣總督任開泰回貴州巡撫任召定長來京○壬寅諭兩淮鹽政普福奏稱兩淮商人共望翠華載莅願捐銀二十萬兩建造臨江等處行宮等語

此奏錯謬已極上次南巡時該督黃廷桂等以 聖祖仁皇帝巡幸所建行宮歷年已久兩淮商人情願捐貲修葺事屬可行是以允其所請後見其增飾過華甚非朕本意曾經降旨申飭上年爲僞稟事尹繼善來京常同軍機大臣等入見伊乃奏請南巡朕面諭以甫經歷覽無待重巡卽閱數載有展義之舉亦必絲毫不令商捐一椽不令增置朕方允爾之請如竟以商捐建置爲例事是乃不欲朕南巡耳此旨眾所共聞今普福忽有是奏殊屬不解朕之巡幸原以省方問俗豈游觀是務此在平時尙所不可況見在江南淮揚等處被水成災朕心軫念截漕拯救議賑議蠲日夜焦勞惟恐一夫失所更何心問及懷居所有商人捐項卽著增備淮揚賑濟之需斯商人之忱已效而仍以爲惠彼桑梓之用也普福著交內務大臣嚴行議處具奏○命四川總督黃廷桂酌撥倉穀

三十三萬石運往江南備賑○甲辰 上奉 皇太后駐蹕避暑

山莊○調德福爲廣東布政使以沈世楓爲湖北布政使夔舒爲

湖南按察使

由辰沅永靖道遷

○丁未

上奉

皇太后巡幸木蘭行圍

○諭軍機大臣等策楞劉統勳奏河工陋弊一摺所稱本任調任升任及緣事各員其經手錢糧大都牽前扯後以致多有侵虧看來此等俱係向來積弊高斌張師載久任河臣非漫無知覺者特延玩瞻徇遂致國家正帑久肥若輩之囊而莫之禁卽如今歲桃源廳孫廷鉞升任梧州交代時高斌勒令通完欠項始准赴任此不過因富勒赫在工乃不得已如此辦理若係高斌於虧空人員俱如此辦理則伊等亦何至積至九萬餘兩之數乎此番徹底清查不重加懲治無以力挽頽風此必非僅予革職著追可以了事者前已降旨令策楞劉統勳就所查出約舉大數一面奏聞請揀

發人員接辦一面將虧帑各員摘印看守策楞等想尚未奉到今所奏僅屬查訪陋弊大槩其實在侵虧之員尙未逐一查奏所奏高斌一節亦屬遷就但高斌等此時見在堵築漫口尙未竣工將來策楞等逐一清查得實具摺奏聞後則漫口亦當堵閉自當明降諭旨著傳諭策楞劉統勳令其仍遵前旨確查據實具奏○己酉授喀爾喀親王成衮扎布第三子占楚布多爾濟公爵次子敏珠爾多爾濟賞給公銜○庚戌諭策楞劉統勳查參河員虧帑誤工一摺閱之竟致駭然高斌深受恩遇委以全河重任張師載因其歷任河員加恩擢授巡撫協辦河務道廳各屬自應釐剔夙弊方無忝委任富勒赫初奏時意高斌等爲屬員所蒙蔽咎在失察及閱高斌摺奏竟屬故縱今據策楞等查出浮冒蒙混種種滋弊如外河同知陳克濬海防同知王德宣虧缺皆至二三萬高斌等

豈竟毫無覺察乃置之不問其視虧帑爲應然彌補爲故智二人之罪其可逭乎至通判周冕應辦物料全無貯備以致二閘被衝束手無策仍不據實題參拏問僅稱誤事撤回另委接辦此尤其乖謬之甚者若非策楞等前往則該員竟致漏網高斌等之居心尙可問乎富勒赫來京陛見朕意其尙可隨高斌學習河務初無成見令其前往釐剔也乃富勒赫到工後高斌等內不自安始拮据查辦逮富勒赫奏聞方稱有查出虧空九萬之多亦並未指名彈劾今經策楞等徹底查出而高斌等負恩溺職捏飾徇縱竟爲天道所不容其敗露有不期然而然者此而從寬則各省督撫執不效尤政令其可問乎高斌張師載俱著革職留工效力贖罪策楞著署理南河總督富勒赫著照張師載之例協辦河務衛哲治著補授安徽巡撫李奇齡著革職嚴審定擬其餘侵帑各員俱著

革職拏問亦不必查抄家產所有侵虧銀兩勒限一年完項周冕著革職鎖押二閘漫口虧空物料勒限半年完項其有限內不能全完者俱卽於該處正法其欠項著高斌張師載及各上司分賠再督臣統轄全省有辦理河防之責河員虧帑玩工不得委爲不知黃廷桂到江未久卽辦大差旋經調任尙未暇查及至尹繼善則前後在江歷有年所且曾任總河積弊自所稔悉伊若早爲舉出卽可及早辦理乃從無一字奏聞是豈國家委任封疆大臣之意尹繼善一併交部嚴察議處○辛亥諭軍機大臣等南河總督事務已降旨令策楞署理看來南河光景自高斌張師載因循滋弊沿習已深經此一番查辦在工各員掩飾周章情態百出策楞當此積玩之餘必當極力整頓嚴肅徵清使頽風一變畫定章程俾屬員有所遵守方爲實有裨益總河一官究以辦事爲主責能

察屬稽弊不專在通曉河務卽如高斌乃素稱通曉河務者而比
 年以來衝決漫淹何嘗不水災疊見藉非高斌在彼其衝決豈更
 有加於此乎惟其不能督察稽覈則工非實工料非實料冒銷浮
 混無所不至策楞稽弊是其所長而於河務未經留意劉統勳向
 曾學習可相助爲理一切熟爲籌畫俟規模略定再行遵旨前往
 河東直隸查察河務至南河虧帑各員除參劾之陳克濟王德宣
 外凡經查出者俱照前旨辦理但伊等領帑入手隨意花銷此番
 著賠是否力能依限完繳策楞當留心察訪並詢問高斌張師載
 自能深知如虧帑各員自知獲罪深重縱酒行樂逮一年期滿自
 戕軀命倖逃顯戮朕必於策楞是問如將來有更代策楞之人並
 將此旨詳悉告之再傳旨詢問高斌張師載伊等平時捏飾徇縱
 以致屬員俱陷法網伊等轉以罷斥自便竟得蕭然事外而已乎

再前所降旨策楞等何時接到伊等見在所辦似悉遵前旨而何日奉到之處未經奏及一併傳諭知之尋奏臣等前劾陳克濬等及請揀發人員二摺卽係遵照八月二十二日諭旨緣臣等以應請交部之摺故未敢將廷寄諭旨日期敘入得旨覽又批此處汝二人略屬取巧蓋始則觀望朕未必肯如是處置高斌是尙未深知朕之乾斷耳

九月戊午諭各省營驛及駐防標營馬匹向例俱令出口採買送部印烙蓋因口馬善於馳驟於營伍爲宜但南省地土卑溼天氣炎蒸且飼餵草豆各殊口馬性不相習每致倒斃卽有存留亦不能經久是於口外馬匹有損於內地營伍無益徒滋商販中飽上年湖廣總督永常奏請於本省及附近省分購買土馬業已准行嗣後除直隸等北五省仍照舊例出口採買外其江浙各省營驛

需馬卽著就近在本省及鄰省買補所有購買口馬之例著停止其本省馬價將來應作何分別准銷之處著該部查明定議具奏○庚申諭策楞劉統勦奏到查出南河河員積年虧空未完工料銀兩數盈鉅萬已降旨將高斌張師載革職留工效力贖罪虧帑之員革職拏問勒限一年如限滿不完卽行正法今又續據查出覈減未完辦料未交各廳員多至十餘萬此皆高斌張師載積年徇縱不行實力清查所致由此觀之各省督撫之徇縱屬員者當不乏人其謂功令森嚴並無虧空者尙可信耶論高斌張師載之罪卽拏問重治其罪亦所應得但高斌尙屬舊人其在河工久經出力張師載懃謹自守素無劣蹟且係隨從高斌是以姑從寬典其應賠之項必不再寬至各省督撫若效尤試法朕自不得不盡法繩之勿謂教之不豫處之不公也其查出虧帑河員例應於任

所原籍抄查貲產朕見邇來人心日壞平時糜帑縱欲自知無所
逃罪輒先期密爲運寄嘗見虧帑累累貲財無幾上司因巧爲開
脫甚或所虧雖自無多而因力難彌補知必敗露遂肆意侵欺別
爲寄頓者此固由心習澆漓而實上司之徇縱有以啓之是以此
番槩不必抄查貲產惟以奉旨之日爲始勒限一年全完者據實
請旨限內未能全完者該督撫於限將滿之前請旨卽於該處正
法虧帑著落上司分賠此次續參各員著卽拏問遵照此旨辦理
朕於此案實爲寒心不惜三令五申各督撫其咸知所儆○丁卯
諭今日行圍隨從侍衛等率多怯懦甚或有畏縮不前者身爲侍
衛於行走之處理宜爭先奮勉不失滿洲舊習今徒步山林卽如
此怯懦若遇軍陣尙何足觀豐安係揚古利額駙之孫朕因念及
伊祖屢經施恩用至領侍衛內大臣當感朕恩法祖效力且身任

管轄之責不能以身表率侍衛反畏縮不前朕前尙且如此則平日又何能管轄侍衛耶豐安著革去領侍衛內大臣副都統公爵作爲三等侍衛效力贖罪再揚桑阿朕念伊父用至侍衛班領副都統伊係隨護之人並不奮力前進尤屬非是著革去侍衛班領副都統作爲藍翎侍衛效力行走隨從侍衛田國恩著革去侯爵○諭軍機大臣等策楞等覆奏見在道廳各官更易者多看守錢糧經理案卷在在需員等語此番清理南河積弊業已剔除其既往猶當慎重其將來見在道廳各員俱係新手從來新舊更代之時弊端百出河工一切備防事宜自屬各員分理而提綱挈領則係策楞之責務當精密周詳不可稍有疏略尤宜出之鎮靜以爲善後經久之計備有不能妥協以致宿習未能淨盡並別滋流弊將來惟策楞是問至另摺所奏高斌贖罪之處錯謬已極前因高

熾張師載在工日久虧帑各員是否能於限內全完伊二人必深
悉其底衷是以傳諭詢問要知各員之虧空卽係伊二人之虧空
如各員限內不能全完則該員固應正法而未完之項卽應著落
伊二人如亦不能完卽將伊二人正法朕法在必行非空言也試
思高斌等平日受朕深恩而獲咎至此此何等罪而乃謂捐貲可
贖耶卽高斌等糊塗而策楞劉統勦所辦何事乃卽具摺代奏著
嚴行申飭見在二閩尙未堵塞卽當令高斌張師載駐工上緊勒
限完竣方與留工效力之旨相符何以並不如此辦理致下河尙
不能斷流災民靡有甯居朕心深爲軫惻將此一併傳諭策楞等
知之○諭開泰范時綬奏酌籌接濟江省米穀兩摺莊有恭辦理
災賑殊屬張皇今年淮揚被水不過數府偏災何至四出告借紛
紛不已此特莊有恭藉此以見其留心災賑令人稱頌其德耳江

省備賑米石屢經朕降旨截漕並傳諭四川山東河南等省撥運米麥接濟賑計不下百餘萬石當已儘足敷用所有湖廣代買之米可以不必卽或江省尙在必需亦止可各以十萬爲率其多餘米石卽留楚省以補倉儲至莊有恭辦理如此張皇殊屬不識大體有意沽名著傳旨嚴行申飭○戊辰調張泰開爲禮部右侍郎轉鄒一桂爲禮部左侍郎調董邦達爲工部右侍郎由禮部右侍郎○己巳諭向來各省教職六年俸滿該督撫學政公同甄別堪膺薦舉者保題送部引見其年力衰邁者咨部休致但督撫陋習旣不肯輕保舉亦不肯多咨革是以保題者固屬寥寥而休致者亦不多見惟使龍鍾衰老之輩濫竽戀棧無所區分蓋視教職爲無足重輕初不計及爲造士之根本也前以選拔貢生爲教職之階曾降旨訓諭各督撫學政令其加意慎重嗣後教職除有劣蹟者隨時參

劾外至六年俸滿堪膺民社者保題其年尙強壯精力未衰可以
留任者出具考語送部引見若准留任俟六年再滿仍如是甄別
如年老人員卽著咨部休致有願來京引見者照大計之例該督
撫聲明給咨引見至訓導一官例止得升縣佐該上司尤多忽略
嗣後甄別之例與教職同著爲令○庚午諭江南揚徐各屬被水
成災屢經降旨加意撫綏截留漕糧撥運川米以資賑恤又恐撥
運過多致各省米貴並令銀米兼賑但照定例又慮災地不敷糴
食著加恩每石增給銀二錢俾災民買食寬裕該部卽遵諭行○
諭據鄂容安奏九月十一日銅山縣張家馬路隄工衝決內隄七
八十丈外隄四五十丈見駐工督辦並請交部嚴加議處等語目
今秋汛已過何致衝漫河隄其中顯有情弊該管同知李焯著革
職拏問交該署督策楞等嚴查據實具奏鄂容安雖署督察河工

非其專責免其交部高斌張師載身任南河日久不能留心查察致該處隄身卑薄疏鬆一時潰決漫延數邑其罪實無可逭伊二人見在留工效力如邵伯二閘決口已塞卽著同往銅山工次上緊堵閉若尙未完卽令高斌速赴銅山勒限堵塞如不能剋期告竣卽行嚴參治罪其疏防賠修之處著策楞照例辦理所有被災戶口該署督查明撫恤無致失所○命運湖北米十萬石江西碾米穀二十萬石於江蘇備賑○壬申諭前命策楞查察南河積弊卽令接辦河道總督原係暫署其於河務究非素習所有江南河道總督著尹繼善補授河工廢弛已極此番清釐之後尹繼善務宜加意督率實心辦理俾弊竇肅清工程堅固以副委任若仍舊習不除一味模稜將循高斌之舊必且加倍治罪陝甘總督著永常調補不必來京請訓卽赴新任尹繼善俟永常到陝卽赴南河

開泰著補授湖廣總督黃廷桂著實授四川總督貴州巡撫員缺
卽著定長補授胡寶琮著實授山西巡撫鄂容安著實授兩江總
督江西巡撫員缺著范時綬調補楊錫綬將次服闋所遺湖南巡
撫員缺仍著楊錫綬補授策楞著補授兩廣總督班第俟策楞到
粵交代後回京○諭德保人旣平庸射箭亦復生疏全無滿洲舊
風不勝侍郎之職著革去侍郎專在內務府總管行走其工部侍
郎員缺著三和調補所遺戶部侍郎員缺著阿里衮補授○諭據
尙書劉統勳奏稱徐州銅山縣黃河衝開縷隄越隄一百四十餘
丈溜勢全行掣過奪河之形已成督臣鄂容安駐工率領員弁搶
護此處河形直趨靈壁虹縣睢甯俱係七月間報災之處已分遣
人員卽行撫恤等語昨據鄂容安奏報卽經降旨令該督等加意
撫綏毋使災黎失所策楞劉統勳鄂容安見駐銅山辦理但此番

查辦南河弊竇糾紛旁午加以堵禦決口稽察散賑諸務叢集而在工員弁及地方官新舊更易又多生手著尙書舒赫德帶同白鍾山卽行馳驛前往協同辦理今年江南黃河漲溢雖屬天災然果平時工程堅固何至於此皆由高斌等徇縱屬員經理不善所致卽將伊等拏交刑部重治其罪亦所應得但伊等轉得脫離工次且亦由朕之誤加任用數年來爲伊所欺轉行自咎耳著卽令高斌張師載將漫決各工勒限堵築完竣其疏防賠修之處仍照例辦理高斌素稱諳練河務今雖離任其一切舊有工程悉其調度若悠悠之口謂因釐剔弊端更易新督以致工員解體是覈實稍弊竟不可行轉使劣員得肆其狡獪伎倆國家功令尙可問乎見據劉統勳奏稱該處於九月初間水勢已十分險急該管員弁並不速報直至漫決已成始行具稟等語明係積年冒銷隄工本

屬卑薄及見清查積弊遂乘此漲漫不復上緊搶救聽其潰決轉可彌縫如此幸災樂禍亟應置之重典所有該工員弁俱著革職拏問該督等遵照前旨查明從重辦理○諭軍機大臣等前經降旨令舒赫德隨護 皇后前往盤山稽察隨從官兵沿途需索但事所關甚細南河正在清查積弊諸務糾紛加以河工屢被衝決在在均須堵築撫恤且在工人員悉更生手策撈劉統勳鄂容安俱駐銅山縣搶築尙恐照料未徧已降旨令舒赫德帶同白鍾山前赴江南協同辦理可傳諭舒赫德令其實力稽查務使南河積弊從此肅清其各屬賑務亦同劉統勳時加體察俾被災窮黎均霑實惠步軍統領印務仍遵前旨著雅爾圖署理所有交令查辦事件如尙未完亦卽交雅爾圖接辦至白鍾山久任河工一切自所素悉前已獲譴復加錄用若不知黽勉出力稍有欺隱使弊端

不能廓除則惟白鍾山是問並令舒赫德傳諭知之○癸酉 上
奉 皇太后駐蹕避暑山莊○甲戌左都御史梅穀成以年老休
致○丙子諭策楞等奏銅山縣小店汛七月間溜偏南岸曾經淮
徐道張宏運查勘下埽後溜勢無定至九月初間隄外沙灘全行
刷去大溜直偏隄根該管同知李焯守備張寶並未及時分報直
至隄頭坍卸始行具報以致漫溢貽誤疏防罪無可寬請將李焯
張寶一併革職拏問並請將淮徐道張宏運交部嚴加議處遊擊
張吉解任效力等語銅山南岸隄工潰決前經鄂容安等奏報已
降旨將李焯張寶革職拏問但該處本非頂衝險工且曾經查勘
下埽乃該同知等以平日侵蝕既多隄工不能鞏固見奉清查將
來獲罪必重幸乘水漲遂任其衝決不加搶護意謂卽以誤工革
職拏問亦事屬因公未必遽正典刑不思歷年之公帑付之波臣

數郡之田廬俱遭蕩析見在堵禦工程糜帑復數十萬是豈尋常貽誤工程可比若不嚴加治罪何以蔽厥辜而昭國憲李焯張寶著卽於該工正法使在工人員知所懲戒此皆高斌張師載負恩徇縱實無可貸但朕究念高斌尙係舊人不忍卽置重典高斌旣得邀恩張師載因並寬宥然國有常刑雖朕於法外矜全曲宥亦不可不使知儆畏著將高斌張師載一同綁赴行刑處所令其目覩李焯張寶行刑訖再行宣示恩旨釋放使伊二人知罪實自取而李焯張寶亦知孽由自造雖死無怨也如此處分旣以正高斌等平時負恩玩縱之辜亦以洩下游數郡被災者之恨然朕於伊二人姑息已甚亦惟高斌施此格外恩耳朕已誤用於前復曲宥於後將使天下督撫議朕用刑不當朕心實有愧焉今年南河固屬天災然亦因年來工非實工料無實料遂至於此高斌平時豈

不料及第以官至大學士自分眷遇尙優未必卽重治其罪不過
賜予罷斥猶得優游林下安富尊榮舉泛溢巨災皆可置諸度外
居心如此實爲天地鬼神之所不容遂致潰敗決裂一至於此而
議者轉謂高斌節省工程覈減過刻致使一切隄防舉無足恃爲
此言者非以摘高斌之短亦非欲解高斌之罪不過冀幸接任督
臣爲所搖撼任其浮銷肆行侵蝕耳不知此等不肖之員覈之愈
寬誤工愈甚河工督臣苟能察屬精明豈致爲所欺蔽若更上下
相蒙則將來獲罪必更甚於高斌張師載矣遊擊張吉著革職留
工效力贖罪其參革道員張宏運曾經查勘下埽卽與該工員弁
同有責成李焞張賓旣已正法豈可獨使漏網著交策楞等將該
員從前如何督看下埽之處另行查明積參從重治罪策楞富勒
赫俱係新任本無應得之罪著免其交部○諭軍機大臣等劉統

勦等奏籌酌堵閉漫口事宜一摺內稱黃水入湖挾清水東入河道清江以下河底可冀刷深此亦無聊之極思耳黃水下注洪湖其流漸緩湖身必且停淤日積下游河底豈能借以刷深治河之道究以多方設法導歸正溜爲是固不可使湖河併勢又不可急於堵塞漫口蓋當此波濤猛急苟非正溜順流卽築壩進埽亦止虛糜工料終屬無益且工料未集何能徒手以禦洪流此時自應廣爲辦料待水勢稍落相度機宜隨方疏濬使正溜仍歸故道則堵築之虞奏功亦易著於圖中硃筆畫處開挖引河則離南岸頂衝旣遠去灣取直乘勢而東趨下暢洩使復故道較之從張家馬路河身迂曲灣繞者似爲便捷可傳諭劉統勦策楞鄂容安令其悉心籌畫妥協辦理至所奏毛城鋪石林口兩處果能分減大溜亦權宜補救之一法伊等若詳加斟酌能減大溜無礙正流不妨

隨宜疏導至見在該處物料不能充裕須豫東二省接濟之處已諭令蔣炳楊應琚代爲購買可一併傳諭知之○諭銅山縣隄工潰決已降旨將貽誤工程之同知李煇守備張賓於該工卽行正法高斌張師載特加曲宥此旨尙未明發可傳諭策楞等將高斌張師載與李煇張賓一同綁縛詢問高斌等二人有何回奏之語並詢以河工弊竇叢生以致在在衝決此皆由伊二人平時負恩徇縱之故久宜自知罪戾及聞銅山隄工潰決亦當恐懼惶悚何以並無一言竟若全視爲策楞富勒赫之事者然在朕雖已委曲加恩伊等未必不反謂處之過當也二人有何回奏著卽記明俟押赴行刑處所令其目覩李煇張賓行刑訖再宣旨仍將伊二人釋放並問伊二人有何回奏言語一一據實奏聞其明發諭旨俟一二日後再發若稍露惟策楞是問此旨已到卽先處分尋奏臣

等於二十九日傳齊高斌等一面綁縛一面傳旨詢問高斌張師
載俱稱分應處死無辭回奏臣等一同押赴隄旁將李焯張賓斬
決後始傳旨將高斌張師載釋放卽問伊有何回奏二人昏迷在
地醒後奏稱我二人悔已無及此時除感恩圖報心中並無別念
報聞○丁丑諭各省由立決改監候人犯情罪本重歷次秋審仍
列入情實上年四十起內未勾者二十三人此次已勾矣祿一起
但節次存留監禁將積而愈多且因緩死而屢次綁赴市曹亦非
所以重刑章也嗣後此項除本年未勾人犯下次仍入情實外其
餘著大學士會同刑部堂官將招冊覆加詳勘其有實在情節可
寬如弟毆兄斃或果因其兄干犯父母迫於親命或素有瘋疾一
時病發凡似此類酌量分別敘述案情確加看語請旨卽入緩決
蓋倫常所繫不厭周詳朕於勾決冊內已再三審量更加一番公

同勘酌則情節益明庶協明慎用刑矜恤民命至意著爲令○戊寅調襄曰修爲吏部右侍郎彭啓豐爲兵部左侍郎○以李因培爲兵部右侍郎仍署刑部侍郎事○庚辰 上奉 皇太后自避暑山莊回鑾

冬十月壬午朔撥浙江帑銀一百萬兩於南河備用○癸未命河南山東湖南各撥米十萬石浙江撥米五萬石於江蘇備賑○甲申命江蘇再截留漕糧二十萬石備賑○戊子以李清芳爲內閣學士

由詹事選

○庚寅命浙江截留漕糧五萬石充兵匠口糧○壬辰

命安徽被災州縣照江蘇例銀米兼賑○甲午 上奉 皇太后還京師○戊戌撥江南長淮等二衛漕糧五萬石並截留江西米十萬石於安徽備賑○庚子命白鍾山以按察使銜協辦南河事○辛丑調吳達善爲兵部侍郎蘇章阿爲盛京刑部侍郎以世臣

爲盛京禮部侍郎

由內閣學士遷

○以楊錫紱爲左都御史調胡寶琛爲

湖南巡撫恆文爲山西巡撫以張若震爲湖北巡撫唐綏祖爲陝

西布政使蔣洲爲山西按察使

由陝西漢興道遷

○壬寅諭據舒赫德策

楞奏稱洪澤湖隄輒石各工坍卸三千餘丈必須修理完整以資

保障請簡派熟諳工程之大臣酌帶工員速行估計分頭董理等

語著侍郎嵇璜德爾敏前往會同該總河督辦於六部司員內揀

選數員帶往差委俱著馳驛其舒赫德從前帶往之司官一併聽

其通融調度俾工程速竣以收捍衛之益○命江南臬甯等三十

一州縣衛額賦及舊欠漕糧漕項分別蠲免○甲辰軍機大臣等

議覆戶部侍郎嵇璜條奏河工事宜一歸仁隄臨河石工宜修查

歸仁隄分隔睢湖諸水設閘啓閉今黃水漫漲入湖自多塌卸但

黃河未歸正溜應否施工請交在工大臣查勘一黃河兩岸閘壩

黃河未歸正溜應否施工請交在工大臣查勘一黃河兩岸閘壩

宜修查設立閘壩原以分流減水保固隄工應交在工大臣相度興修一下河宜設專員經理查下河一帶黃運江防向係淮揚道管理今該道既難兼顧或另添道員或就近令兩淮運使兼管請交在工大臣定議一堆積土牛之制宜嚴查河工向令夫役積土備用原期搶險有資應交河臣嚴飭各廳汛員弁督率夫役隨時畚鍤不得於近隄處取土至該侍郎所稱五壩蓄洩及南關等壩蓄洩之處應交欽差大臣相度情形悉心經理得旨依議高斌久任南河總督惟事姑容受工員欺蔽虧帑誤工情狀顯著經朕特派劉統勳策楞前往清查而工員等不思侵冒之當釐轉因疑畏而解體迨二閘疏虞欽差同總河到工督率堵禦而顧此失彼將銅山兵役撤往併力搶修張家馬路隄工竟諉之衰老無能之同知守備溜勢南徙尙坐視不報以致潰敗不救靈虹睢宿一帶胥

受其災而二閘決口亦不可復塞河徙雖屬天災而人事實相濫
合朕之重治高斌之罪者在此語云耕當問奴織當問婢高斌在
河工二十年專以工務爲事習見熟聞孰得孰失其所見究與按
圖懸揣者迥異大學士等雖按形勢定議但未身歷其境其於見
在情形是否允協尙宜再加詳酌著將此摺交舒赫德等與尹繼
善高斌等逐條細閱其是否悉合機宜及此外有無未盡一一指
陳高斌身獲重罪凡從前經理不善之處甯無追悔卽應就此改
圖豈容固執已經誤工不過含糊認罪不能細心參酌冀贖前愆
則伊從前居心真不可問且益滋罪戾無可復追矣尹繼善夙任
南河胸中自有所見且卽伊本任之責務各屏去成見妥協詳酌
使黃流淮瀆從此順軌安瀾以慰朕懷總之治河貴得機要其詞
度止在瞬息之頃卽如車邏等壩原以減洩運河漲水而高斌當

乾隆十一十二等年水盛之時盡力謹守儲俸無事下游更獲豐收遂固執以爲已有成效竟可不開而卒以釀成壅潰之患而數年所得實不償此番所失是高斌旣誤於前若尹繼善將來鑒於前轍矯枉過正遂以洩水保工爲上策而安心以高寶爲壑則早放車邏等壩可以年年無事而令下游歲歲被災朕必將重治其罪又如浮言咸以開毛城鋪爲高斌之罪不知毛城鋪乃自高斌而閉昨劉統勳面奏謂此高斌數年不白之冤益可見浮言之不足信惟身惡者能知之也今又有稱黃河減水諸閘應修是違開毛城鋪之說耳而不知溜勢旣分恐無以刷沙將又有議其後者從來爲政不在多言朕因河患宵旰憂勤日召在廷諸臣詳悉講求其欲復黃河故道使北流者旣迂遠難行至謂蓄洩宜勤閘壩宜固隄埝宜增海口宜濬則河員足任徒事撝拾空言無難編成

巨帙昔人云議禮如聚訟議河者亦如聚訟噤噤不已甚無取焉
此後仍有以治河奏者必將原摺發還○賞江南河工員弁銀二
萬兩○舒赫德奏江南上游州縣冬月以銀折賑下游州縣艱於
舟販請以米散給從之○己酉諭向來外省辦理刑名每存姑息
之見卽有關倫常亦多遷就謂累由死者率作兇徒以無心架格
或兩相湊合用力過猛此婦寺之仁以救人一命爲造福究之展
轉達部仍歸按律定擬空留此不近理之談而實乖弼教之義甚
無謂也近雖降旨訓飭至再至三而積習牢不可破卽如山西省
陸三傑因所分田產蕩賣無餘乘父病垂危仍索分田地伊叔陸
應唐忿責用小刀扎傷陸三傑額顙陸三傑奪刀回扎致斃胞叔
陸應唐悖倫滅理莫此爲甚乃該撫本內所敘案情則云陸三傑
用刀恐嚇陸應唐搶刀勢猛以致扎傷等語是陸應唐反爲應死

之人矣似此滅絕倫紀之事人人所共憤而仍爲委曲捏敘情節承辦之府縣臬司以至該撫亦豈不知陸三傑罪在不宥而習慣自然以書吏取供故套爲當然不知改正則實有可矜情節者將致魚目不明矣著嚴飭行嗣後如有似此者刑部卽聲明駁正將承審各官從重議處以正倫理而申國憲

十一月壬子朔諭會典館進呈纂修詹事府會典則例多沿襲舊文未加更定詹事府乃東宮僚佐儲貳未建其官原可不設第以翰林敘進之階姑留以備詞臣遷轉地耳古稱建儲爲國大計朕酌古準今深知於理勢有所難行載在史冊者姑置弗論卽如理密親王當 皇祖聖祖仁皇帝時 聖慈鍾愛初無閒言嗣以東宮旣建狎暱匪人陷於失德再致廢黜其先所置宮僚何嘗非一時之選如湯斌卽所稱當代醇儒然亦何裨萬一蓋別立宮府則

僚屬多人賢否參雜斷難保其不滋事端夫以聖祖之包含宏
大尙迫於宗社之重必不可容可見建儲一事亦如封建井田
固不可行之近世也是以皇考鑒於前事默定宸衷不事建
儲分府惟擇老成宿望大臣如朱軾鄂爾泰福敏張廷玉蔡世遠
等勸讀內廷聖謨深遠慈覆如天朕繼承以來恪遵家法
令皇子等讀書內廷亦惟慎簡師傅俾之薰陶德性讀習經書日
有程課其視出閣就傳有名無實者相去爲何如耶要之豫教固
所當重實亦存乎其人此則蒼穹之敷祐宗社之貽庥景運
靈長有非人力所致者矣會典載春秋進講虛文縟節甚爲無謂
又如皇太子賀筵論體制當由內閣撰擬乃由詹事府頒發此亦
前明坊局間曹藉以招事示權已耳果爾則賀皇太后皇后表
箋亦當由內務府頒發耶此皆沿襲之謬著該總裁官改正進呈

○停藩臬副將慶賀表箋○增甘肅牧馬孳生廠地○癸丑諭前
令各省督撫保舉堪勝知府人員送部引見其劣者卽行駁回優
者已不次擢用至敕部記名者不過備數充用各省府佐州縣干
有餘員其中惻惻無華者不見知於上司或有十年不調之歎而
庸才倖膺簡缺無他劣蹟督撫亦未免苟且姑容殊非激敘官方
之道其各省同知通判及知州知縣內有本任歷俸十年以上者
該部查明行文該督撫出具考語陸續送部引見著爲例○諭軍
機大臣等御史魏涵暉條陳河工效力人員應照各省之例揀選
引見發往所奏甚是南河效力定額百二十員其一切工程則各
有廳員專管卽分防大汛及遇缺委署閒亦需人止須足數差遣
而已何必如許之多此等人員到工之後自備資斧無所獲利勢
必競爭欺蒙指平爲險惟冀添築工程恣其浮冒是誤工虧帑皆

若輩爲之歷來河臣徂於陋習不察其弊殊不思各省州縣刑名錢穀頭緒紛繁何嘗不一人兼理未見於正印之外槩委多人紛紛協辦也嗣後河工亦應照各省之例按其額設員缺陸續酌量奏請發往以備委署或有緊要工程萬難兼顧必資分辦者亦應限以數目不得仍前濫請徒使有名無實著傳諭舒赫德劉統勳策楞尹繼善令其詳悉酌議奏聞尋奏南河效力人員向係任意收錄雖經減定一百二十人仍屬過多查估驗工程物料應河臣暨該管道員親身督率修防工程係應員專責均不應委之效力人員見在河工額設同知通判及巡檢間官共九十五員效力人員差遣備用應請以六十人爲率如遇緊要工程數不敷用再請揀發但效力應員必明白幹練方收實用嗣後需用同知通判應飭部於候補及曾任河員內請旨揀發下吏部議尋議河工效力

定額江南一百二十員直隸七十員河東六十員人數過多應如該尙書所奏江南定以六十員直隸亦應裁三十五員河東三十員均於候補及曾任河員內揀發從之○乙卯修先農壇○丙辰諭御史魏涵暉因淮徐等處被水奏請敕諭江南鄰省督撫照舊例留養流民春融資送回籍等語留養流民之法從前曾已行之不過有名無實轉滋多事且於災民實無裨益導之使輕去其鄉耳近日巡撫衛哲治已經摺奏故未准行蓋與其留養於異方何如厚加賑恤使不致流移轉徙之爲愈今年淮徐等處被水朕疊次降旨多方蠲濟截漕撥餉不惜數百萬帑金加恩撫恤以留養資送之費計之何啻百分之一二豈有愛焉若以留養資送所需增爲本地賑濟豈不更霑實惠乎且災地賑務俱令該督撫親行查辦又特派大臣前往督察小民雖一時艱食原可靜待賑濟

其扶攜四出者大率無藉之徒必非安分良民且自山東聞賑而歸者屢遇南來之人此近日問之董邦達而知者夫以災地派委多員挨戶查賑尙恐不能一無遺濫鄰省州縣各有本任應辦事務又何從辨其是否災黎徒令奸民在本地則乘機濶冒及資送則聚眾強搶去而復返日不暇給而實在被災流民或依傍戚屬或傭工餬口者又必逐一稽留安插於伊等生計益致拘礙此臨政日久閱歷而知之最切者故停止此例魏涵暉原摺著發還並宣諭中外知之○丁巳改直隸文安等三營遊擊爲守備○己未召蘇昌來京以鶴年爲廣東巡撫雙慶爲倉場侍郎由內閣學士遷○庚申禁武職任所置產○諭淮徐等處瀕湖居民毋侵占湖身○以塔永阿爲內閣學士由鴻臚寺少卿遷○辛酉命侍郎三和帶通曉測量人員赴江南相度引河○壬戌大學士禮部議覆貴州巡撫定長

奏黔省士子三科五經缺額二名與乾隆九年酌減定數不符應
否定爲三十八名或改歸專經照原議仍取中四十名等語查五
經士子果其淹通經術專經尤易見長若無實學惟事剽襲轉滋
倖進應如該撫所請嗣後各省五經中額槩行停止所遺額數令
該各督撫查明歸入卷多文佳之專經內取中副榜一併照辦從
之○丁卯諭軍機大臣等據班第奏增城逆犯王亮臣等家產估
變銀四千餘兩爲善後案內衙署兵房之用一摺叛產入官卽以
充善後公用自應如此辦理但叛逆重罪大抵皆無藉之徒藉此
哄誘愚民誑騙財物或因饑寒切身迫於萬不得已乃鋌而走險
今逆犯等家田產既有四千餘金以中人之產計之尙可爲溫飽
之家何至相率作賊耶此案辦理固無可疑而案犯挾仇誣扳承
審官以事關重大不敢遽爲昭雪因而波及無辜亦事之所有惟

在該督撫等詳悉體察耳封疆大吏除暴安良是其專責儻有叛逆斷不可不辦朕非惡聞其事特以案情既重承辦官員尤宜加意詳慎若意在根求而或不免於株累則於整頓地方之道失之遠矣近年江廣閩粵皆有此等案件閱班第摺因念及此可通行

傳諭各督撫知之

○壬申命貴州苗疆地方停止會哨○以奉寬

爲內閣學士

由詹事遷

○甲戌諭軍機大臣等定邊左副將軍成袞扎

布等奏準噶爾杜爾伯特台吉車凌車凌烏巴什等率所部三千

餘戶來降暫駐於額克阿喇勒遣使相聞已將軍營豫備各遊牧

之兵調遣防範朕觀車凌等來降似非叵測何也達瓦齊與訥默

庫濟爾噶爾構兵不已俱令車凌等相助兩家勝敗既難豫定卽

幸而所從者勝亦仍受其約束自不若歸降大國冀得安生伊等

既經來至邊卡將情事實告應卽令其入內休息可速傳諭成袞

扎布卽遣軍營明白厯練大員前往曉諭告以爾等率眾投誠業經奏聞大皇帝大皇帝念爾等俱準噶爾台吉大員率領部眾輸誠向化甚可嘉憫今所駐額克阿喇勒乃我邊卡外地儻有追兵至此未便應援或有所失朕心深爲不忍卽可移入卡內駐紮今冬將軍成衮扎布來京伊等自必懇求赴京瞻仰朕躬卽將車凌車凌烏巴什及其頭目酌帶數人同來從前準噶爾台吉阿喇布坦丹濟拉等投誠俱封以顯爵優加賞賚其宰桑及部落人等皆授官分產至今安居樂業伊等入見後朕自格外加恩此時先令成衮扎布動用官項牛羊賞給伊等以爲接濟其駐牧處所另行酌定至準噶爾素稱狡詐固宜派兵防範但伊等天性好疑亦不可啓其猜嫌儻車凌等願留卡外居住我雖豫備無庸宣露若已入卡內則更無可疑不須過爲防範今特遣侍郎玉保馳驛前往

並加恩將朕所用元狐帽賞給車凌車凌烏巴什各一頂端罩各一件成衮扎布可卽遵旨辦理又諭朕聞準噶爾小車凌端多布之孫訥默庫濟爾噶爾與達瓦齊互相征戰是以台吉車凌等率所部來降可寄信問薩喇爾訥默庫濟爾噶爾是否卽係小車凌端多布之孫其識見力量果否能與達瓦齊相持並令將伊知車凌車凌烏巴什之處明白具奏○實授楊應琚山東巡撫○戊寅實江南堵築決口兵丁一月餉銀○己卯諭軍機大臣等張若震以擢授巡撫具摺謝恩並請陞見已於摺內批諭令其不必來京卽赴新任矣張若震久歷外任於吏治尙能熟練且各省藩司中資俸之深亦無有過之者湖北巡撫缺出一時不得其人是以前特加擢用耳此番擢用雖出於伊之望外但朕於用人行政一秉至公決不因其爲張廷玉之姪而遂稍存意見不加倚任然張若震

若因此而妄自滿假又或自揣才分得此已足以爲外而總督內而尙書大學士非所敢望遂一切模稜了事以爲保守官職之計則將來獲罪更重此等均不能逃朕洞鑒張若震當益加奮勉國家恩澤必當善爲承受亦卽以勉圖報效之地也可再傳諭張若震知之

十二月壬午許武職赴任借支養廉○丙戌諭軍機大臣等向來治河有用混江龍之法臣工中屢有以此爲言者且謂靳輔亦曾用之朕意前人雖有此法恐亦紙上空談未必實能奏效株守陳編者或見爲新奇可喜耳尙書蔣溥又稱明人亦云混江龍殊不可行前河臣靳輔疏濬河淤之鐵埽筴似較便捷其法於二里半一墩每墩一船船尾各繫鐵埽筴二令河兵往來疏刷等語是以二里半之長以河面兩岸相距之廣僅船二隻而一月又僅有三

上之期彼弁兵之用力與否尙難期必豈能望其一律深通看來亦未必大有裨益卽如今日普福摺內以泰州之斗龍王家二港見在於淺委員籌辦混江龍前往分頭疏導漸獲通流此以施之於支河小港或易於見功非所論於挾沙奔注之黃河也但亦不妨姑一試之試之而效固爲有益卽行之無效亦非有大損不若開濬黃河北流故道諸說之迂遠難行也且嵇璜亦主此議著傳諭舒赫德等於合龍後諸事告竣會同奉命諸人查勘混江龍鐵埽第之法均不妨試一行之其適用與否不過一二日卽可立見如不可行亦可釋羣疑而息異論矣再北岸大引河見在已告成未並近日埽工情形若何仍不時據實奏聞以慰懸念尋舒赫德等奏連日進埽大溜一半回趨正河進行迅速已開放北岸大引河更無阻滯得旨欣慰覽之劉統勳等奏試放混江龍鐵埽第往

來多時僅刷深寸許黃河急流奔注旋疏旋淤斷難恃此深通得旨足見浮言無資實濟然不如此試看其執書以說者猶以爲可行也○丁亥協辦大學士吏部尚書孫嘉淦卒遺疏聞諭孫嘉淦老成端謹學問淵醇宣力有年勤勞懋著前因患病卽遣太醫調治並命皇子前往看視尙冀速痊今聞溘逝深爲軫悼著派散秩大臣一員侍衛十員往奠茶酒賞銀一千兩辦理喪務所有應得卹典該部察例具奏尋予祭葬諡文定○諭軍機大臣等據成衮扎布奏稱準噶爾宰桑瑪木特來追車凌旣經阻止復強入我邊卡其後噶勒藏多爾濟等又有來追之信已就近調遣豫備兵丁先以理曉示再爲相機辦理等語所辦尙合機宜但準噶爾人等若遵行和好應在卡外聲明緣由靜候處置乃我卡上人等阻止瑪木特並不遵行直入內地是太輕視我兵加入無人之境矣不

惟國家大體攸關亦眾喀爾喀部落聲名所繫理應相機擒剿又何必以和好爲言夫卡座乃邊陲定界彼此不可相踰今瑪木特既直入無懼儻仍聽其自行回巢則將來準夷得志必至漸生覬覦出入無忌近日準夷內亂堂堂天朝固不肯乘釁發兵攻取若窮蹙之人來降朕爲其主豈忍不容留養育使車凌等在卡外爲瑪木特追及尙可不必往援今已入卡而瑪木特冒昧恃強儼然挑釁豈可輕縱成裘扎布等既經派兵策應伊等或知斂迹尙可徐觀動靜儻恣肆妄行自當以逸待勞盡爲剿絕且瑪木特帶兵二百直入之時若果卽爲擒獲羈候則續來之人自不敢逞此時作何辦理速行具奏侍郎玉保頗悉準夷情事著在參贊大臣上會同將軍等相機酌辦前鋒統領努三散秩大臣薩喇爾並著在參贊大臣上行走速行前往協同辦理○命尙書舒赫德赴鄂爾

坤軍營辦理軍務○己丑戶部等部議准前署兩廣總督班第等奏瀕海地方漲出沙灘每處多至萬餘畝或少數百畝廣州府之南海番禺東莞順德新會香山尤多盡開成田於民食有濟但南海等縣地大事繁於報墾案俱委典史巡檢查勘不能彈壓請專交廣州府海防同知管理遇開墾爭控事件查勘詳報並於該同知關防內添入兼理沙政字樣從之○庚寅命戶部尚書蔣溥協辦大學士以黃廷桂爲吏部尚書仍管四川總督○壬辰諭軍機大臣等成衮扎布等奏稱瑪木特闖入邊卡近又畏我有備潛行逸出等語前據達清阿等因防範追兵已派貝子車木楚克扎布公密什克帶兵三百名往巴顏珠爾克博托和尼溝中間堵截續經成衮扎布派格勒克巴木丕勒兵一千名前往策應又就近派兵一千名協助是見在兵力不爲不多瑪木特如此任意出入既

未曾擒勦於前又不能追逐於後視同烏有殊爲駭異達清阿見駐邊卡近地何不相機辦理夫邊卡如門戶然豈容闖入今瑪木特又經回巢聽其出入不加懲創可乎此時準夷內亂之秋尙如此恣肆數載後或養精蓄銳侵犯邊卡其何以保我喀爾喀耶達清阿等旣會領兵防範卽著迅速前往或以計取或以力攻若不擒獲瑪木特伊尙何顏復返其駐防烏里雅蘇台著烏勒登前往至成衮扎布於瑪木特出入之際並未籌及擒勦方略然則將軍職掌但須查取信息據文奏報已乎著嚴行申飭今命尙書舒赫德前往軍營一應機宜與伊等商酌辦理○丙申江南張家馬路及邵伯湖二閘決口同日合龍○己亥命哈密賽巴什達里雅回子每年屯田穀石全行賞給○調德爾格爲盛京兵部侍郎卞塔海爲盛京戶部侍郎○庚子諭軍機大臣等永常奏稱準夷貿

易之期將屆請仍舊暫爲官辦照例動帑豫備等語看來可不必
先期豫備此時達瓦齊與訥默庫濟爾噶爾彼此搆兵應無暇計
及貿易但夷人有利必趨或仍循往例遣使前來哈密亦未可定
可傳諭永常令其卽行卻回並曉以從前加恩噶爾丹策零是以
准其按年貿易嗣策妄多爾濟那木扎勒暨喇嘛達爾扎乃噶爾
丹策零之子今達瓦齊非其族類且由弑奪而得又並未遣使請
安何得仍循往例況近日瑪木特前來北路闖入邊卡繼復畏罪
逃回覓在遣人前往究問若達瓦齊知犯界非理縛獻自贖並遣
使奏明或可仍准貿易此時不當遽許如來使不肯卽回宛轉求
請卽應剴切曉諭俾知恩不可以倖邀儻在邊生事卽與賊人犯
境無異自當相機擒捕不得聽其猖獗著傳諭永常妥協辦理務
合機宜可也○調蘇章阿爲盛京工部侍郎吳拜爲盛京刑部侍郎

郎○丙午諭軍機大臣等據尹繼善奏稱河工虧空各案該參員等因虧空數多思圖狡展應追應抵款項多有牽混見在按款研鞫等語看來此又係尹繼善舊習未除不覺自然流露矣河員虧空總以一年爲限如限內不完卽行正法從前所降諭旨甚明其款項細瑣舉所不論尹繼善摺內故用狡展牽混等字樣以見其查辦甚嚴而實則爲虧空各員豫存地步不過欲一年限滿時仍以牽混未清未便卽行正法搪塞耳此等伎倆伊自問豈能於朕前嘗試耶伊如欲爲該參員等狡展惟肯以一己之首領代之則亦聽其自爲計耳前者高斌張師載陪綁河干未卽正法看此光景將來必至以見任總河寅之重典而後已耶南河惡習至此不加顯戮何能痛革朕辦理庶政言出法隨務在必行著傳諭尹繼善令其知所自處再所有各參員內如防範不能嚴密或有畏罪

自戕冀逃憲典者尹繼善卽欲覲顏見朕其可得乎此處向已嚴諭策楞令其轉告新任今策楞之賁已卸不知曾告尹繼善否耶亦令據實具奏尋奏虧空各案自當依限嚴追各參員不使畏罪自戕之旨前策楞於臣到江時已詳悉告知見俱派妥役看守仍不時密察報聞○己酉欽差尙書劉統勳等奏查勘黃河入海巨套據沿海兵民稱海口舊在雲梯關近因海水漸退河身兩岸生淤增長百餘里臣等查巨套均在七曲港之上巨一里十巨僅十里套則七八里十里不等十巨去海口甚遠河流通塞與增巨無涉卽十套之下河身數十里分流入海亦無阻遏無庸疏濬報聞○是歲朝鮮來貢○會計天下民穀數各省通共大小男婦一萬八千三百六十七萬八千二百五十九名口各省通共存倉米穀二千九百二萬八百二十四石三斗六升九合三勺零